

## ՀՈՎՀԱՆՆԵՍ ԲՐԳՈՒԹԵՆՅԻ ԳԱՆՁԵՐՆ ՈՒ ՏԱՂԵՐԸ

**Բանալի բառեր՝** Հովհաննես Բրգուլթենց, Ոստան քաղաք, գանձ, տաղ, ձեռագիր, Աղթամար կղզի, Սուրբ Խաչ եկեղեցի, Թովմաս առաքյալ:

Հովհաննես վարդապետ Բրգուլթենց Ոստանցու գրական ժառանգության մեջ առանձնակի տեղ ունեն Աղթամարի Ս. Խաչին և Ս. Թովմաս առաքյալին ձոնված գանձերն ու տաղերը: Հովհաննես Բրգուլթենցի մասին հիմնական աղբյուրը նրա աշակերտի թողած չափածո հիշատակարանն է՝ 1424 թ. Հովհաննես գրչի ընդօրինակած ձեռագրում (Գրիգոր Տաթևացի, Քարոզգիրք, ՄՄ 2077), որը հետագայում՝ 1582 թ., պատկանել է Հովհաննես Բրգուլթենցին<sup>1</sup>: Համաձայն Ներսես վարդապետ Ակինյանի՝ չափածո հիշատակարանի հեղինակը Հովհաննես Բրգուլթենցի աշակերտ Ներսես աբեղա Բաղիշեցին է<sup>2</sup>: Ն. Ակինյանը, հիմնվելով այդ և այլ սկզբնաղբյուրների վրա, շարադրել է Հովհաննես վարդապետ Բրգուլթենցի կյանքը և գիտամանկավարժական գործունեությունը<sup>3</sup>:

Հովհաննես Բրգուլթենցը ծնվել է Ոստան քաղաքի մոտ գտնվող Վառնիշատ գյուղում: Նրա ծնողներն էին Դուլիջանը և Նուբարը, եղբայրներից հայտնի են երկուսի անունները՝ Մուրատ և Ոսկեան, նաև նրանցից մեկի զավակի անունը՝

\* Մեսրոպ Մաշտոցի անվան Մատենադարան, պ.գ.թ., tumanyan.lusi@gmail.com, հոդվածը ներկայացնելու օրը՝ հոկտեմբերի 18, 2022, գրախոսելու օրը՝ նոյեմբերի 29, 2022:

<sup>1</sup> «Թէ որ գաւակ Սիոն ունի, / Արեւայութիւն բաժին լինի, / Որ եւ յետաց այնմ բանի / Փիլիսոփայն քաջ եւ արի, / Զոր Գրիգորի նման լինի, / Նարեկա վանից վանականի, / Հայոց յազգէ ծնեալ լինի, / Ի յՈստանա մեծ գաւառի, / Որ մականունն Բրգոս ասի, / Եւ Յովհաննէս նա յորջորջի, / Ի բնէ նա աշակերտի, / Ներսէս քաջ վարժապետի, / Որով բանի հմուտ լինի, / ԶՆարեկացին յորդ մեզ պատմի, / Եւ Հին ու Նոր Կտակարանի / Ի վեր է քան զիմաստ բանի: / Ստացաւ զգիրս Բարդի / Յիշատակ անցնչելի, / Ի յամերամ ժամանակի, / Եւ ծնաւոյցն իւրոյն բարի՝ / Դուլիշանի եւ Նուբարի, / Եւ եղբարցն հարազատի՝ / Ոսկեանի եւ Մուրատի, / Եւ եղբար որոյն Բահլուլի, / Անփորձ պահէ Տէր ի յերկրի: / Է նա բնական Վառնիշատցի, / Ի Պատրկայ մենաստանի, / Որ է հանդէպ Ոստան քաղքի, / Մարըն լուսոյ Աստուածածնի, / Եւ Գեորգեա Զօրավարի, / Եղիշէի դանբարանի, / Երախտաւոր հայոց ազգի...». ՄՄ 2077, 313աբ: Մայր ցուցակ հայերէն ձեռագրաց Մաշտոցի անուան Մատենադարանի, հ. 2, ձեռ. 2077-ի նկարագրող՝ Զ. Քէօսէեան, խմբ.՝ Գ. Տէր-Վարդանեան, Երևան, 2012, էջ 1366-1367:

<sup>2</sup> Հ. Ներսէս վ. Ակինեան, «Յովհաննէս վ. Բրգուլթենց Ոստանցի գանձասաց», ՀԱ, 1937, թիւ 1-5 (այսուհետև՝ Յովհ. Բրգուլթենց), էջ 210:

<sup>3</sup> Հ. Ներսէս վ. Ակինեան, Բաղէշի դպրոցը (1500-1704), Վիեննա, 1952 (այսուհետև՝ Բաղէշի դպրոցը), էջ 56-66, «Յովհ. Բրգուլթենց», էջ 210-215:

Բահլուլ: Հովհաննես Բրգուլթենցը եղել է Պատրկի վանքի միաբան, ապա Բաղեշում աշակերտել է Ներսես վարդապետ Ամկեցուն: Ն. Ակինյանը ենթադրում է, որ Հովհաննես Բրգուլթենցը վարդապետական գավազան է ստացել մոտավորապես 1570 թ., իսկ 1575 թ. Բաղեշում Հովհաննես գրչի ընդօրինակած Ավետարանի ստացող Բրգուլթենցն արդեն հիշվում է որպես վարդապետ<sup>4</sup>:

Հովհաննես վարդապետի և նրա ծնողների անունները գրված են նաև իրեն պատկանող այլ ձեռագրերի հիշատակարաններում: Երբ Հովհաննես Բրգուլթենցը Պատրկի վանքի միաբան էր, նրա պատվերով ընդօրինակվում է Գրիգոր Տաթևացու «Գիրք Հարցմանց»-ը (ՄՄ 852), ուր նա խնդրում է հիշել իրեն, իր ծնողներին, եղբայրներին, եղբորորդուն. «Ես՝ Յովաննէս վարդապետ զՈստանայ, որ սուրբ տառս ըստացայ յիշատակ ինձ եւ իմ ծնողացն՝ Դուլիջանին եւ Նուբարին, եւ եղբարցն՝ Մուրադին, Ոսկէվանին, եւ եղբորորդոյն՝ Բահլուլին, եւ ամենայն արեան մերձաւորացն՝ կենդանեաց եւ ննջեցելոց, եւ Աստուած ողորմի ասացէք նոցա. Ամէն: Գիրքս Յովաննէս վարդապետին է յՈստանայ, ի սուրբ ուխտէն Պատրկայ, որ հանդէպ քաղաքին Ոստանայ»<sup>5</sup>:

Հովհաննես վարդապետը ծավալել է մանկավարժական գործունեություն և ուսուցանել բազմաթիվ աշակերտների, որոնցից են եղել Սիմեոն Ապարանցին և Բարսեղ Գավառացին<sup>6</sup>: Վերջիններս իրենց բազմիմաց ուսուցչի մասին թողել են հիշատակություններ: Բարսեղ վարդապետը, որը նաև հմուտ և վայելչագիր գրիչ էր, իր ընդօրինակած մատյաններում ակնածանքով է տալիս ուսուցչի անունը: Այսպես, 1598 թ. Բաղեշի Ամրդուլու վանքում ընդօրինակած «Մեկնութիւն Գործոց առաքելոց» ձեռագրում (ՄՄ 2605) Բարսեղ վարդապետը գրում է. «Այլեւ ուսուցչին իմոյ՝ քաջ հռետորին Յովաննէս րաբունապետին, որ մականուն Բրկութենց ասի, եղիցի յիշատակ մատեանս այս...»<sup>7</sup>, իսկ 1604 թ. գրած «Մեկնութիւն Ավետարանին Մատթէի» մատյանի (ՄՄ 1282) հիշատակարանում նշում է. «նաեւ զուսուցանող վարժապետն իմ զՅովաննէս րաբունապետն, որ մականուն Բրգուլթենց կոչի»<sup>8</sup>:

Հովհաննես Բրգուլթենցի մյուս աշակերտը՝ Սիմեոն Ապարանցին, իր Վիպասանության մեջ ևս անդրադարձել է ուսուցչին՝ ձոնելով նրան գեղեցիկ տողեր:

<sup>4</sup> Բաղեշի դպրոցը, էջ 57, «Յովն. Բրգուլթենց», էջ 210: Ն. Ակինյանը նշել է Հովհաննես գրչի ձեռագրի թվահամարը Երևանի պետական թանգարանում՝ 138, որն այժմ ՄՄ 7548 ձեռագիրն է. տե՛ս Յուզակ ձեռագրաց Մաշտոցի անվան Մատենադարանի, հ. Բ, ցանկները և հավեմատական տախտակները՝ Օ. Եգանյանի, Երևան, 1970, էջ 1525:

<sup>5</sup> ՄՄ 852, 1ա, 65բ, 263բ, 271ա: Մայր ցուցակ հայերէն ձեռագրաց Մաշտոցի անուան Մատենադարանի, հ. Գ, կազմ.՝ Օ. Եգանեան, Երևան, 2007, էջ 993-994:

<sup>6</sup> Բաղեշի դպրոցը, էջ 59, «Յովն. Բրգուլթենց», էջ 212:

<sup>7</sup> ՄՄ 2605, 211ա: Բաղեշի դպրոցը, էջ 60, «Յովն. Բրգուլթենց», էջ 212:

<sup>8</sup> ՄՄ 1282, 261բ: Բաղեշի դպրոցը, էջ 60, «Յովն. Բրգուլթենց», էջ 212:

Սիմեոն վարդապետը Բրգութենցին համեմատել է հրեշտակների և պայծառ արևի հետ. «Զի հրեշտակացն էր նա սարաս, / Անհամեմատ յերկրաւորացս, / Սըրբազանիցըն գերադաս, / Տէր Յովհաննէս Հոգւովն օծեալս... / Արևն ի մայրն վերադարձած, / Արուեսկին պայծառացած...»: Նշում է նաև Հովհաննէս վարդապետի՝ գանձեր և մեղեդիներ հեղինակելու հանգամանքը. «Իմաստութիւնն արձանացած, / Գանձ, մեղեդի, երգ սըրբասաց, / Ըզհոգևորն պըտուղ շըրթանց, / Գըրով թողեալ աշակերտաց...»<sup>9</sup>: Այս օրինակները վկայում են հայ միջնադարում տիրող ուսուցիչ-աշակերտ ակնածալից հարաբերությունների մասին ընդհանրապես:

Մեծանուն այս վարդապետին անդրադարձել է նաև պատմագիր Առաքել Դավրիժեցին՝ որպես նրա ուսուցիչ նշելով Ներսես վրդ. Ամկեցուն, իսկ որպես աշակերտ՝ Բարսեղ վրդ. Գավառեցուն. «Այլեւ էր ինքն Բարսեղ վարդապետն ի գաւազանէն՝ որ ի Տաթեւացոյն յառաջ եկեալ եւ սերեալ, այսպիսի կարգաւ: Նախ՝ Գրիգոր Տաթեւացին, նորին աշակերտ Դանիէլ. նորին՝ Յովհաննէս Համշէնցին. նորին՝ Չորթան Գրիգոր Արճիշեցին. նորին՝ Ներսէս, որ Մատաղ ասի. նորին՝ Ներսէս Բաղիշեցին. նորին՝ Ներսէս Ամկեցին. նորին՝ Բրգութ Յովհաննէս Ուստանցին. նորին՝ Բարսեղ Գաւառցին, որ է այս Բարսեղս, որոյ վասն բանս է: Սորին աշակերտ Մոկացի Ներսէս ի գեղջէն Ասկնջաւայ, զորոյ մականունն Բեղլու ասեն, զի մեծ էր բեղն: Սորին աշակերտ Մելքիսէթ Երեւանցի, ի գեղջէն՝ որում անունն էր Վժան»<sup>10</sup>:

Մինչև այժմ Հովհաննէս վրդ. Բրգութենցից հայտնի էին հետևյալ ստեղծագործությունների բնագրերը, որոնց անդրադարձել է Ներսես Ակինյանը<sup>11</sup>.

1. «Գանձ Գետարգել Սուրբ Նշանին». Ն. Ակինյանը որպես աղբյուր նշել է այն ժամանակ էջմիածնի Մատենադարանին պատկանող, իսկ այժմ՝ ՄՄ 2672 ձեռագիրը (404բ-6ա),

2. «Տաղ Գետարգել Սուրբ Նշանին» (ՄՄ 2672, 406բ),

3. «Պատմութիւն ամենազօր սուրբ Խաչին, որ պարգեւեցաւ ի թագաւորացն Յունաց Վասլի եւ Կոստանդեայ, եւ բերեալ եղաւ ի սահմանս Մոկաց». Ն. Ակինյանը որպես աղբյուր նշել է Նզմ. 1428 և Նիկոսիայի հմր. 1 ձեռագրերը: Սույն գործը, սակայն, առկա է նաև ՄՄ 5128 ձեռագրում (235ա-239ա)<sup>12</sup>:

Անդրադառնանք մեզ հետաքրքրող գանձերին ու տաղերին: Խաչիկ Լևոնյա-

<sup>9</sup> Սիմեոն վ. Ապարանցի, Վիպասանութիւն սակս Պահլաւունեանցն զարմի եւ Մամիկոնեանցն սեռի, Վաղարշապատ, 1870, էջ 131-132: Բաղէշի դպրոցը, էջ 60-61, «Յովհ. Բրգութենց», էջ 212-213:

<sup>10</sup> Առաքել Դավրիժեցի, Գիրք պատմութեանց, աշխ. Լ. Ա. Խանյարեանի, Երևան, 1990, էջ 311:

<sup>11</sup> Բաղէշի դպրոցը, էջ 65-66:

<sup>12</sup> Հովհաննէս վրդ. Բրգութենցի նշյալ երեք ստեղծագործությունների բնագրերը պատրաստում ենք հրատարակության:

նր նարեկավանքին նվիրված իր հոգվածում գրում է, որ Աղթամարի հաշատուր Բ Շիրոյան կաթողիկոսը նարեկավանքից ձեռագրեր և թանկարժեք սպասք է փոխադրել Աղթամար՝ այնտեղ թողնելով միայն քայքայվածները: Այդ ձեռագրերից մեկը՝ Գանձարան, բովանդակում է Հովհաննես Բրգուլթենցի՝ Աղթամարի Ս. հաչին և Թովմաս Առաքյալին նվիրված ներբողները. «... Աղթամարայ յատկացուց, հոն տանելով նաև նոյն Վանուց եկեղեցւոյն կարեւոր սպասներն և գրչագիրները, հոն թողլով միայն քայքայուածներն ու անպէտները, որոնց մէջ աչքի կ'զարնէ մասնաւորապէս գանձ գիրք մը, հեղինակուած Բրգուլթենց մականուանեալ Ոստանցի Յովհաննէս վարդ.էն...: Այդ գանձերը կ'վերաբերին Աղթամարայ Ս. հաչին և Թովմաս առաքելոյն իբրեւ ներբողականներ, որոնք ձայնաքաղ են և բաւական կանոնաւոր ոճ մ'ունին»<sup>13</sup>:

Հետեւելով Խ. Լեոնյանին՝ այս նույն տվյալը հաղորդել է նաև Ն. Ակինյանը: Վերջինս գրում է նաև, որ Ղևոնդ վրդ. Փիրղալեմյանը Աղթամարում տեսել է 1602 թ. գրված մի Գանձարան, որում կա Հովհաննես Բրգուլթենցի՝ 1588 թ. Աղթամարին ձոնված գանձը<sup>14</sup>: Թեև ներսես Ակինյանը նախորդներից տեղյակ էր Հովհաննես վարդապետի՝ Աղթամարի Ս. հաչին և Թովմաս առաքյալին նվիրված գանձերի ու տաղերի մասին, սակայն նրան հասու չեն եղել դրանց բնագրերը: Փորձել ենք գտնել նշյալ երկու ձեռագրերը և սույն հոգվածում վերհանել բնագրերը:

Մեծ եղեռնի ժամանակ Աղթամարից փրկված ձեռագրերի մեջ կա մի Գանձարան՝ գրված 1440 թ. Ոստանում Կարապետ գրչի ձեռքով, իսկ պատվիրատուն եղել է Նարեկ գյուղից Պետրոս անունով մի հյուսն, որը բաղձալի ձեռագիրը նախատեսել էր Ս. Թովմաս առաքյալի վանքի համար: 1866 թ. նոյեմբերի 16-ին այս մատյանը նարեկավանքում տեսել և հիշատակարանն արտագրել է Ղևոնդ վրդ. Փիրղալեմյանը<sup>15</sup>: Տարիներ անց մատյանը հայտնվել է Աղթամարի վանքում, ինչի մասին հուշում է ձեռագրի էջերից մեկում հետագայում անվարժ ձեռքով գրված փոքրիկ գրովթյունը (210բ): 1915-1916 թթ. այն, ի շարս Վանա լճի կղզիներում պահվող շատ այլ ձեռագրերի, տեղափոխվել է Ս. էջմիածին<sup>16</sup>, իսկ այժմ դա ՄՄ 5404 ձեռագիրն է: Ժե դարում ընդօրինակված այս ձեռագրի վերջում կան կցված թերթեր (211ա-213բ), որոնց վրա Ժե դարի գրովթյամբ ընդօրինակված են Հովհաննես Բրգուլթենցի՝ Թովմաս առաքյալին ձոնված գանձը

<sup>13</sup> Խ. Լեոնեան, «Նարեկայ վանքն եւ Նարեկացին», Բիւզանդիոն հայաթերթ ամենօրեայ, Կ.Պոլիս, 1903, քիւ 2031:

<sup>14</sup> Բաղէշի դպրոցը, էջ 63-64:

<sup>15</sup> Ղ. վ. Փիրղալեմեան, Նշխարք պատմութեան հայոց, ՄՄ 6332, էջ 131-132:

<sup>16</sup> Յուզակ ձեռագրաց Մաշտոցի անվան Մատենադարանի, Բ. Ա, կազմ.՝ Օ. Եգանյան, Ա. Զեյթունյան, Փ. Անթաբյան, Երևան, 1965, էջ 102:

և տաղը: Քանի որ այս մատյանը պահվել է Նարեկավանքում, ինչպես արդեն վերը տեսանք, ապա ենթադրում ենք, որ հենց սա է նկատի ունեցել Խաչիկ Լևոնյանը: Յավոք, կան թափված էջեր. բացակայում է գանձի սկզբի հատվածը՝ առաջին և երկրորդ տները և երրորդ տան սկիզբը (գանձն ունի ծայրակապ, այսինքն տների առաջին տառերով կազմվում է հեղինակի անունը՝ ՅՈՎԱՆՆԵՍ, ինչից էլ կոահել ենք պակաս տների քանակը)<sup>17</sup>, իսկ տաղից միայն առաջին մի քանի տողն է պահպանվել: Պահպանված թերթերը բավականին քայքայված են, շատ հատվածներում թանաքը ջնջված է, և գիրը դժվարընթեռնելի է, սակայն կարողացանք բնագիրն ամբողջությամբ ընթերցել: Գանձի վերջին տողերում հեղինակը նշել է իր անունը. «Գըթայ երգող գանձիս Թումային ի Յովաննէս յիմար եւ անարին, Որ մականունն Բրգուլթ ձայնէին» (213բ):

Ինչ վերաբերում է Ղևոնդ վրդ. Փիրղալեմյանի՝ Աղթամարում տեսած 1602 թ. ձեռագրին, ապա կարծում ենք, որ այն Թումա Մինասենցի 1445 թ. ընդօրինակած հայտնի Գանձարանն է (ՄՄ 5521), որի վերջին էջերին 1602 թ. Ներսես անվամբ գրիչը հավելել է Հովհաննես վրդ. Քերովթենցի հեղինակած գանձն ու տաղը՝ նվիրված Ապարանից Ս. Նշանին, և Հովհաննես վրդ. Բրգուլթենցի հեղինակած գանձն ու տաղը՝ նվիրված Աղթամարի Ս. Խաչին<sup>18</sup>: Գանձը վերնագրված է «Գանձ Աղթամարայ Սուրբ Խաչին ի Բրգուլթենց Յովաննէս վարդապետէ Ոստանցոյէ», ունի ծայրակապ՝ «ԲՐԳՈՒԹԷ»: Տաղը վերնագրված է «Տաղ անոյշ ի Բրգուլթենց Յովաննէս վարդապետէ Ոստանցո», ունի ծայրակապ՝ «ՅՈՎԱՆՆԵՍ»: Այս խորագրերը և ծայրակապերը ևս փաստում են դրանց հեղինակային պատկանելությունը: Ս. Խաչին և Թովմաս առաքյալին ձոնված գանձերում Հովհաննես Բրգուլթենցը նշել է նաև դրանց թվականները՝ Ս. Թովմասին նվիրված գանձը հեղինակել է 1579 թ., իսկ Աղթամարին նվիրված գանձը՝ 1586 թ. (տե՛ս ստորև գանձերի բնագրերը):

Անդրադառնալով Հովհաննես վրդ. Բրգուլթենցի՝ Ս. Խաչին նվիրված գանձին, նշենք, որ այն բովանդակում է արժեքավոր պատմական, արվեստաբանական և աստվածաբանական վկայություններ. դրանց մի մասը քաղել է Արծրունյաց Անանուն պատմիչի երկից, մի մասն էլ նկարագրել է որպես ականատես և հայտնել իբրև ժամանակակից:

1. Գանձում ականարկված է Աղթամարի եկեղեցու կառուցումը Գագիկ Արծ-

<sup>17</sup> Քանի որ Աղթամարի Ս. Խաչին նվիրված տաղի ծայրակապը «ՅՈՎԱՆՆԵՍ» է, ոչ թե «ՅՈՎ-ՀԱՆՆԵՍ», ուստի ենթադրելի է, որ սույն գանձի ծայրակապը ևս «ՅՈՎԱՆՆԵՍ» է, և պակասում է երեք տուն:

<sup>18</sup> ՄՄ 5521, 423ա-431ա: Օգտվել ենք սույն ձեռագրի (ՄՄ 5521) դեռևս անտիպ նկարագրությունից՝ նախատեսված Մաշտոցի անվան Մատենադարանի «Մայր ցուցակ հայերէն ձեռագրաց»-ի համար, նկարագրող՝ Նաիրա Թամամյան:

րունի արքայի կողմից. «Րախարար սիրով բաղձալի, / Աստուածապսակ Գագիկ արքայի, / Ընտրեալ գոլով յազգէն Արծրունի...» (429բ): Ինչպես հայտնի է, Գագիկ Արծրունի թագավորը Աղթամար կղզում կատարել է ծավալուն շինարարական աշխատանքներ: Նրա նախաձեռնությամբ կղզին պարսպապատվել է խոցելի տեղերից, ունեցել ամուր հիմքերով նավահանգիստ: Թագավորի հրամանով ճարտարապետ Մանուելը կառուցել է արքայական պալատը, իսկ 912-921 թթ. ընթացքում՝ Սուրբ Խաչ եկեղեցին, որը հայ ճարտարապետական մտքի, մշակութաստեղծ ոգու հիասքանչ արգասիքներից է:

2. Նկարագրված է եկեղեցու կառուցման տեղը, անունը՝ Ս. Խաչ, մեծամեծ, սրբատաշ քարերով կառուցված լինելը. «Հիմունս արկեալ յԱղթամար կղզի, / Շինեաց զտաճարն, որ Սուրբ Խաչ կոչի, / Բարձրաւանդակ ի պատշաճ տեղի, / Մէջ կապուտակ ծովուն որակի: / Տարփատենչ, բարի ամենայն ազգի, / Վիմաւք փակեալ եւ անշարժելի, / Մեծատաշ, դերբկի<sup>19</sup> կոփւածով քարի, / Երկաթագամ եւ անխախտելի» (429բ):

Ինչպես գրում է Արծրունյաց Անանուն պատմիչը, Գագիկ արքան ամրապնդում է իր երկրի սահմանները՝ ճնշելով թշնամիներին: Երբ իր զորքով արշավում է դեպի Ասորեստանի սահմանը, Կոտոմ բնակավայրում տեսնում է Աղձնյաց հայ իշխաններին պատկանող հին հեթանոսական ամրոցը, որը նվաճել էր արաբական զուրարիկ ցեղը: Գրավելով տարածքը, արքան քանդում է Կոտոմի ամրոցը և քարերը բերելով՝ կառուցում Ս. Խաչ եկեղեցին. «ամրոց մի յիշխանատանն Աղձնեաց, ի գեաւղն Կոտոմ... եւ զշինուածս ամրոցին ի հիմանց տապալեալ՝ զքարինս նորա բարձեալ բերէ ի վերայ մկանաց ծովուն, ընծայելով ի նիւթ շինութեան սրբոյ եկեղեցւոյն, կանգնելով փոխանակ բագնաձեւ պղծալից յարկացն զտաճար փառաց»<sup>20</sup>:

«Վիմաւք փակեալ եւ անշարժելի, / Մեծատաշ, դերբկի կոփւածով քարի, / Երկաթագամ եւ անխախտելի» բառերով հեղինակը հավանաբար ակնարկում է եկեղեցուն՝ ամուր և անխախտելի հիմք ունենալը, շինարարության մեջ մեծամեծ քարերի գործածությունը և պատերի՝ սրբատաշ քարերով երեսպատված լինելը:

Եկեղեցու ճարտարապետությունը նկարագրելիս Արծրունյաց պատմիչը չի մանրամասնում շինարարական առանձնահատկությունները, սակայն արքու-

<sup>19</sup> Ծնթ. 57:

<sup>20</sup> Թովմա Արծրունի և Անանուն, Պատմություն տանն Արծրունեաց, աշխ. Գ. Տէր-Վարդանանի, Մատենագիրք Հայոց, ԺԱ. հատոր, Ժ. դար, Անթիլիաս-Լիբանան, 2010, էջ 290: Աշխարհաբար՝ «Աղձնիքի իշխանական տան մի ամրոց՝ Կոտոմ անունով գյուղում... հիմքից տապալեց ամրոցի շինությունը, նրա քարերը, բարձեց [նավերը] և բերեց ծովի վրայով, տվեց սուրբ եկեղեցու շինության համար: Եվ կոտոմն ձև ունեցող պղծալից շենքի փոխարեն կանգնեցրեց փառաց տաճարը»: Թովմա Արծրունի և Անանուն, Պատմություն Արծրունյաց տան, ներած., քարգ., ծանոթ.՝ Վ. Վարդանյանի, Երևան, 1978, էջ 300:

նական պալատի և նավահանգստի պարագայում, որոնք ևս կառուցել էր Գագիկ արքան, այդ մանրամասները նշված են: Պալատի համար պատմագիրը գրում է. «...որոշ որմոյն լայնութիւնն երկւք մեծաքայլութեամբ չափով ունի զպարզ-ուածսն, գունդ անապակ կրոց եւ քարի, իբրեւ զհալուածս կապարի եւ պղնձոյ ընդ միմեանս խառնեալ», անգամ նշում է կիրառված շինանյութերի քանակը. «Պատմեաց մեզ եւ հաւատարիմ ոստիկան մի ի գործավարաց քաղաքին, եթէ եմուտ ի շինուած տաճարին երկաթ լտերս իբրեւ երկերիւր հազար...»<sup>21</sup>: Նավահանգստի համար պատմագիրը ևս մանրամասնում է. «Ի շրթունս խորայատակ հիմանց ծովուն դնէ դրունս ահաւորատեսս, հաստահեղոյսս, բեւեռապինդս»<sup>22</sup>: «Երկաթագամ» նշանակում է երկաթով գամված, ամրացված, նույն բևեռապինդ իմաստն ունի<sup>23</sup>, սակայն, մենք որևէ հիմք չունենք պնդելու, որ եկեղեցին կառուցելիս օգտագործվել է երկաթ (թեև պալատի դեպքում, ինչպես տեսանք, գործածվել է), ուստի կարծում ենք, որ գանձում հեղինակն այս բառով ակնարկում է եկեղեցու՝ ամուր հիմքը:

3. Գանձում տրված է եկեղեցու ճարտարապետական տիպը. «Գրմբեթաւոր տաճար սքանչելի, / Աղթամարայ Սուրբ Խաչ գովելի... / Իւթեղ, չքնաղ յարկ չնաշխարհի, / Զորեքանկեան եւ քառակուսի» (429բ, 430բ): Ս. Խաչ եկեղեցին քառախորան, խորանամերձ անկյուններում երեք քառորդ խորշերով, խաչաձև գմբեթավոր հորինվածքով կառույց է, ճարտարապետական առումով նման Արծրունիների հնագույն սրբավայրերից Զորագիրի Սուրբ Խաչին<sup>24</sup>: Հ. Օրբելին նշում է, որ ճարտարապետական այն հորինվածքը, որն ունի Ս. Խաչը, արդեն իսկ տարածված էր Հայաստանում. «По плану он представляет один из вариантов распространённого типа армянских церквей: крест, обра-зованный четырьмя апсидами-экседрами, которые в восточном и за-

<sup>21</sup> **Թովմա Արծրունի և Անանուն**, 2010, էջ 289: Աշխարհաբարձ՝ «Մրա ումերի լայնությունն ունեւ 3 մեծաբայլ չափ տարածություն: Ումերը անապակ կրի ու քարի զանգվածներ էին, որ իրար էին խառնված, ինչպես կապարի ու պղնձի համաձուլվածքը», «Քաղաքում աշխատող գործավորներից վստահելի մի վերակացու մեզ պատմեց, որ պալատի շինության վրա բանեցվել է 200 հազար լիւր երկաթ...»: **Թովմա Արծրունի և Անանուն**, 1978, էջ 298-299 (երկաթի քանակը հաշված է լիւրով. մեկ լիւրը հավասար է 326 գրամի): Աղթամարի պալատի ճարտարապետական նկարագրի մասին տե՛ս **Ի. Օրբելի**, *Избранные труды*, М., 1968, т. 1, с. 34-68. **Տ. Գրիգորյան**, «Աղթամարի Արծրունյաց պալատը և հայ-բյուզանդական գեղարվեստական փոխառնչությունները զարգացած միջնադարում (IX-X դդ.)», *ՔՄ*, 29, 2020, էջ 401-420:

<sup>22</sup> **Թովմա Արծրունի և Անանուն**, 2010, էջ 288: Աշխարհաբարձ՝ «Ծովի խորանատակ հիմքերի բերանին նա դրեց ահավորատես, հաստահեղոյս, բևեռապինդ դռներ»։ **Թովմա Արծրունի և Անանուն**, 1978, էջ 297:

<sup>23</sup> Նոր բառգիրք Հայկազեան լեզուի (նշբ), հ. Ա, կազմ.՝ Հ. Գ. Աւետիքեան, Հ. Խ. Սիւրմէլեան, Հ. Մ. Ազեքեան, Վենետիկ-Ս. Ղազար, 1836, էջ 686:

<sup>24</sup> Ս. Մնացականյան, *Վարպետաց վարպետներ*, Երևան, 1982, էջ 36-38:

надном крыле несколько отдалены от центрального подкупольного квадрата; в углах креста, между экседрами, находятся глубокие, примерно в три четверти круга, ниши... Этот вариант плана, повторяю, очень распространенного и в Армении и в Грузии, притом в обеих этих странах особенно излюбленного в местах пребывания епископских или патриарших кафедр»<sup>25</sup>:

4. Նշված է ճարտարապետի անունը՝ Մանուել. «Վիմաւք մածեալ անդրդրդելի, / Մանուէլ կառոյց ձեռամբքն իւրովի» (430ա): Արծրունյաց պատմագիրը մեզ հասակ փոխանցել է ճարտարապետի անունը՝ Մանուել, իսկ պատկերաքանդակների թեմաների հարցում նրա խորհրդականը եղել է մի կրոնավոր, որի անունը մեզ հայտնի չէ. «Եւ քանզի ճարտարապետ արուեստին էր Մանուէլն, զոր ի վեր անդր ցուցաք, այր լի իմաստութեամբ եւ զաւրաւոր ի գործս իւր, հրաշակերտէ զեկեղեցին զարմանագործ արուեստիւ. եւ զոր վերագոյնն ցուցաք՝ կրանաւորն ձեռն տայ նկարագրել զքարինսն...»<sup>26</sup>:

5. Թվարկված են պատերի պատկերաքանդակները՝ որթագալարները, բազմատեսակ թռչուններն ու կենդանիները, հինկտակարանյան մարգարեներն ու նորկտակարանյան առաքյալները, իսկ «Հոր անդրանիկ» ասելով նկատի ունի Քրիստոսին. «Որթըն սորեկ, ազնիւ, պիտանի / Քո սուրբ գաւիթս տնկեալ բուսանի, / Ժողով գնդի սուրբ մարգարէի, / Սուրբ առաքեալքն ի քեզ նըկարի: / Աւետարանիչք Նորոյս Կտակի / Կենդանագրեալ ի չորից կողմի, / Ազգի ազգի թռչունք թեալի / Են նկարեալ յորմն տաճարի, / Այլեւ յովով կենդանիք յայտնի / Սարսափելի մարդկան երեւի, / Հաւր անդրանիկն ի քեզ իջանի, / Իբր տաճարն Սողովմոնի» (430բ):

Աղթամարի Ս. Խաչ եկեղեցին արտաքուստ ամբողջությամբ հարդարված է պատկերաքանդակներով, և գլխավորապես դրանց շնորհիվ դարձել է ոչ միայն հայկական, այլև համաշխարհային մշակույթի անկրկնելի կոթողներից մեկը: Պատկերաքանդակների գոտիներն են՝ Տերեւների չընդհատվող գոտի, Թեմատիկ հարթաքանդակների գոտի (Գլխավոր գոտի), Կենդանագլուխների (Պահպանիչ խորհրդանշանների) գոտի, Որթագալարի (Որթատունկի) գոտի, Դիմաքանդակների և զինանշանների (Իշխանների) գոտի, Կենդանավազքի գոտի և չորս ավետարանիչների պատկերները<sup>27</sup>:

«Որթըն սորեկ, ազնիւ, պիտանի / Քո սուրբ գաւիթս տնկեալ բուսանի»: Եկեղեցին բոլորող գոտիներից մեկը որթագալարի գոտին է, որը գրեթե չունի ընդհատումներ: Որթագալարի մեջ ներկայացված են առանձին-առանձին տեսա-

<sup>25</sup> И. Орбели, нзл. աշխ., էջ 70-71.

<sup>26</sup> Թովմա Արծրունի եւ Անանուն, 2010, էջ 291:

<sup>27</sup> И. Орбели, нзл. աշխ., էջ 77-78: Ս. Մնացականյան, Աղթամար, Երևան, 1983, էջ 43:

րաններ, սակայն հորինվածքային առումով՝ որթագալարները շարունակական շղթա են կազմում: Այս գոտում պատկերված են այգու հովանավորները, այգու մշակման և պահպանության (մենամարտ կենդանիների արջերի, առյուծների հետ), բերքահավաքի, գինու պատրաստման և բերքի վայելման տեսարաններ<sup>28</sup>:

«Ժողով գնդի սուրբ մարգարէի, / Սուրբ առաքեալքն ի քեզ նըկարի»: Եկեղեցու բարձրաքանդակներում տեղ են գտել հինկտակարանյան մի շարք տեսարաններ և մարգարեների պատկերներ: Պատկերված են՝ հարավային ճակատին Իսահակի զոհաբերությանը, Հովնան մարգարեն, Դավիթ թագավորը և Գողիաթը, մեդալիոնների մեջ Հովել և Նավում մարգարեները, Սամուել մարգարեն, արևելյան ճակատի մի ծայրում՝ Եղիա մարգարեն ամբողջ հասակով, մյուս ծայրում՝ Հովհաննես Մկրտիչը, հյուսիսային ճակատին՝ Ադամը և Եվան, Սամփսոնը, Դանիել մարգարեն առյուծների գբում, Եսայի մարգարեն, Եզեկիել մարգարեն և այլն: Առաքյալներից պատկերված են Հայոց լուսավորիչներ Թադեոսը և Բարդուղիմեոսը՝ արևելյան ճակատին, կենտրոնական լուսամուտի կողքերին:

«Աւետարանիք նորոյս Կտակի / Կենդանագրեալ ի չորից կողմի»: Եկեղեցու ճակատներին չորս ավետարանիչների ամբողջ հասակով բարձրաքանդակներն են՝ Մատթեոս (արևմտյան ճակատ), Մարկոս (հյուսիսային ճակատ), Դուկաս (հարավային ճակատ), Հովհաննես (արևելյան ճակատ)<sup>29</sup>:

«Ազգի ազգի թռչունք թեալի / Են նկարեալ յորմն տաճարի»: Բարձրաքանդակներում ներառված են նաև զանազան թռչունների, կենդանիների, առասպելական կենդանիների, հուշկապարիկների պատկերներ: Թռչունների պատկերները շատ են հատկապես «Կենդանավազքի» գոտում. պատկերված են կտուցներում օդակ բռնած արծիվներ, կովի պատրաստ աքաղաղներ, օձի հետ կռիվ տվող թռչուններ և այլն<sup>30</sup>:

«Այլեւ յոլով կենդանիք յայտնի / Սարսափելի մարդկան երեւի»: Եկեղեցու քանդակագործ գոտիների մեջ իր ոճով առանձնանում է կենդանագլուխների շարքը, որ նկատելի կերպով դուրս ցցված է: Դուրնովոն և Աս. Մնացականյանը այս քանդակները համարել են Կոտոմից բերված հայկական հին հեթանոսական տոտեմների քանդակներ<sup>31</sup>: Ինչպես արդեն վերը նշել ենք, Գագիկ արքան Աղթամարի եկեղեցին կառուցել է Կոտոմի ամրոցից բերված քարերով: Ընդ

<sup>28</sup> И. Орбели, нзл. Աշխ., էջ 135-158, Ա. Ասրյան, «Սուրբ Խաչի պատկերաբանականներ», Աղթամարի պատմամշակութային ժառանգությունը, հեղինակ-կազմող՝ Կ. Մաթևոսյան, Ս. Էջմիածին, 2013, էջ 76-77:

<sup>29</sup> Ս. Տեր-Ներսիսյան, Հայ արվեստը միջնադարում, Երևան, 1975, էջ 78-88:

<sup>30</sup> Կենդանավազի գոտու նկարագրությունը տե՛ս Աս. Մնացականյան, նշվ. աշխ., էջ 133-144:

<sup>31</sup> Աս. Մնացականյան, «Հեթանոսական ժամանակների ֆանդակներ Աղթամարի Սուրբ Խաչ վանքի ումնաշարվածում», ԼՀԳ, 2, 1983, էջ 83-93: Л. Дурново, Очерки изобразительного искусства средневековой Армении, Москва, 1979, с. 73-74:

որում, Արծրունյաց Անանուն պատմիչի գրածից պարզ է, որ այդ քարերը պատկանել են Կոտոմի ամրոցի հեթանոսական տաճարին<sup>32</sup>: Պատմիչը նշում է, որ բազնաձև տաճարի փոխարեն կառուցեց փառքի տաճար. «կանգնելով փոխանակ բազնաձևե պղծալից յարկացն՝ զտաճար փառաց: Աստանօր կատարի ասացեալն ի մարգարէէն՝ «որ հանէ զպատուականն յանարժանէն՝ իբրեւ զբերան իմ եղիցի», ուր միշտ հանգչի Հոգին Սուրբ, վերագրելով զմարդիկ յանստուեր լոյսն»<sup>33</sup>:

Այն մասին, թե ինչպես են հեթանոսական այդ քանդակները ներդաշնակվել Աղթամարի քրիստոնեական քանդակների համակարգին, Աս. Մնացականյանը գրում է. «Դրա համար անդրադառնանք վանքի արևելյան պատի կենտրոնում գետեղված, դրախտի անդրանիկ բնակիչ, Ադամ նախահոր քանդակապատկերին: Նրա աջ ու ձախ կողմերում տեղ են գտել հեթանոսական կենդանաքանդակները, իսկ տեսարանի ընդհանուր իմաստը արձանագրությամբ պատշաճեցվել է. «Եւ կոչեաց Ադամ անուանս ամենայն անասնոց և գազանաց» մտքին: Դա առնված է Աստվածաշնչի Ծննդոց գրքի Բ գլխի 20-րդ և հաջորդ տներից, ուր ասված է. «Եւ կոչեաց Ադամ անուանս ամենայն անասնոց և ամենայն թռչնոց երկնի, ամենայն գազանաց վայրի»: Այս եղանակով են, ահա, Կոտոմի կուռքերը ենթարկվել քրիստոնեական գաղափարներին և տեղ գտել աստվածաշնչային գաղափարաքանդակների շարքում»<sup>34</sup>:

Հետաքրքրական է Կ. Մաթևոսյանի դիտարկումը հեթանոսական տոտեմների և Ս. Խաչ եկեղեցու քանդակազարդման վերաբերյալ. «Միաժամանակ չենք բացառում, որ Աղթամարի եկեղեցու կառուցման ժամանակ հենց Կոտոմի քանդակների առկայությունն է ծնունդ տվել այն գաղափարին, որ թագավորական եկեղեցին պետք է արտաքինից ամբողջովին քանդակազարդվի»<sup>35</sup>:

Հաւր անդրանիկն ի քեզ իշանի, / Իբր տաճարն Սողովմոնի: Եկեղեցու հարավային ճակատին պատկերված են գահին բազմած Քրիստոս և գահին բազմած Ս. Աստվածամայրը Մանկան հետ: Քրիստոսի ևս մեկ ահեղ պատկեր կա արևմտյան ճակատին՝ Գագիկ Արծրունին Ս. Խաչ եկեղեցու մանրակերտը պարզել է Քրիստոսին:

6. Գանձում ակնարկված է Աղթամարի թագավորանիստ և կաթողիկոսա-

<sup>32</sup> Կ. Մաթևոսյան, Պատմահնագիտական դիտարկումներ, Երևան, 2020, էջ 82-83:

<sup>33</sup> Թովմա Արծրունի եւ Անանուն, 2010, էջ 290: Աշխարհաբարը՝ «Եվ կուտան ձև ունեցող պղծալից շենքի փոխարեն կանգնեցրեց փառաց տաճարը: Այստեղ կատարվեց մարգարեի ասածը՝ «Եթե պատվականը անարժանից գատի, իմ բերանի պես կղառնա» (Երեմ. ԺԵ, 19), ուր միշտ հանգչում է Սուրբ Հոգին, մարդկանց ընծայելով անսովոր լույսը»։ Թովմա Արծրունի եւ Անանուն, 1978, էջ 300:

<sup>34</sup> Աս. Մնացականյան, նշվ. աշխ., էջ 92:

<sup>35</sup> Կ. Մաթևոսյան, Պատմահնագիտական դիտարկումներ, էջ 93:

նիստ լինելը. «**Թագաւորաց գահ բարձր ի յերկրի, / Թագ բերկրանաց Հայոց մեծ ազգի, / Աթոռ փառաց, տեղ պատրիարգի, / Սրահ լուսոյ, ճեմարան Բանի**» (430բ): Աղթամարը, ինչպես հայտնի է, բնակելի է եղել վաղնջական ժամանակներից. այստեղ գտնվել են նախաուրարտական ժամանակաշրջանի կիկլոպյան ամրոցի պատերի մնացորդներ, հայտնաբերվել է նաև Մենուա թագավորի (Ք.ա. 810-786) մի սեպագիր արձանագրություն<sup>36</sup>: Դ-է դարերում Աղթամարը եղել է Ռշտունի նախարարների ամրոց-բնակատեղին, ապա անցել է Արծրունի իշխաններին և վերածվել բերդաքաղաքի: 908 թ. Գագիկ Արծրունին Վասպուրականում թագավորություն է հռչակում՝ Աղթամարը վերածելով քաղաքական և հոգևոր-մշակութային կենտրոնի: Ավելի ուշ՝ 1113 թ., Աղթամարում Արծրունիների ստեղծած թագավորության հենքի վրա հաստատվում է կաթողիկոսական Աթոռ<sup>37</sup>:

7. Վկայված է նարեկավանքին մոտ գտնվելը. «**Մերձ առ շիրմին վեհին Գրիգորի / Աստուածաբան սուրբ վարդապետի, / Որ հանգուցեալ ի նարեկ գեղջի / Հուպ առ հիմըն սուրբ Սանդրխտի**» (430բ): Ինչպես հայտնի է, նարեկավանքը կառուցվել է Ժ դարում, Վանա լճին հարավային ափին մոտ՝ նարեկ գյուղում: Վանքը կառուցվել է մեզ հայտնի առաջին հայ նահատակի՝ հայոց Սանատրուկ արքայի դուստր ս. Սանդուխտի մասունքների վրա: Համաձայն Հ. Ոսկյանի նկարագրության՝ «Վանքը շինված է թեկ քարերով, պարսպապատ է եւ բաղկացած սրբուհի Սանդուխտի եւ Ս. Աստուածածնի տաճարներէն, ս. Գրիգորի մատուռէն, ժամատնէ մը եւ զանգակատնէ մը»<sup>38</sup>: Ս. Սանդուխտի մասունքները գտնվել են սրբուհու անունը կրող գլխավոր եկեղեցու հարավային խորանի տակ: Եկեղեցուն հարավից կցված էր Ս. Աստվածածին եկեղեցին, իսկ արևելքից կցված էր ս. Գրիգոր նարեկացու մատուռ-դամբարանը: Ժամատան մեջ գտնվել են վանահայրեր Անանիա և Հովհաննես նարեկացիների գերեզմանները<sup>39</sup>:

8. Նշված է Աղթամարի՝ ոչ միայն կաթողիկոսանիստ լինելը, այլև Աղթամարի կաթողիկոսների՝ Արծրունյանց տոհմից սերելու հանգամանքը. «**Հայրապետաց պարքըն զետեղի, / Մեծ եւ երջանիկ քաջ մետրապալտի, / Ի քեզ նստեալ տոհմէն Արծրունի, / Կաթողիկոս հանուրց Հայկազնի**» (430բ): Աղթամարի առաջին կաթողիկոս Դավիթ Ա Թոռնիկյանը (1113-1165) որդին էր Ամուկ ամրոցի տեր Աբղմեսի իշխանի և սերում էր Խեղենիկ իշխանից, որն Արծրունի թագավորների տոհմից էր: Ուստի՝ Աղթամարի կաթողիկոսները շարունակողներն

<sup>36</sup> И. Орбели, изд. աշխ., էջ 31. Н. Арутюнян, Корпус урартских клинообразных надписей, N 79, Ереван, 2001, с. 100-101.

<sup>37</sup> Մ. Եսայ. Իգմիդեան, Հայրապետութիւն Հայաստանեայց Առաքելական Սուրբ եկեղեցւոյ եւ Սիրու Աղթամար, Ս. Էջմիածին, 2008, էջ 99-103:

<sup>38</sup> Հ. Ոսկեան, Վասպուրական-Վանի վանքերը, Մաս Ա., Վիեննա, 1940, էջ 190:

<sup>39</sup> Նույն տեղում, էջ 190-192:

էին Արծրունցյաց թագավորներին՝ միայն թե աշխարհիկի փոխարեն հոգևոր տիտղոս կրելով: Մինչև ժԳ դարավերջը Աղթամարի կաթողիկոսական Աթոռը Խեղենեկյան-Արծրունիների ձեռքին էր, իսկ 1272 թվականից, երբ կաթողիկոս է ընտրվում Ստեփանոս Սեֆեդիյանը, Աթոռն անցնում է Սեֆեդիյաններին, որոնք մայրական կողմից Արծրունիների սերունդն էին և մինչև ժԶ դարավերջն իրենց ձեռքում են պահել Աթոռը<sup>40</sup>:

**«Կաթողիկոս հանուրց Հայկազնի»:** Ուշագրավ է, որ Վասպուրականում ընդօրինակված ձեռագրերի հիշատակարաններում ևս Աղթամարի կաթողիկոսները շատ հաճախ հիշվում են որպես «Ամենայն Հայոց եւ Աղթամարայ»՝ արտահայտելով իրենց ձգտումը յուրացնելու կաթողիկոսի ընդհանրական իշխանությունը<sup>41</sup>: Այս իրողությունը պայմանավորված էր նրանով, որ Ամենայն Հայոց Հայրապետական Աթոռը գտնվում էր Կիլիկիայում: Ուստի, Աղթամարի կաթողիկոսները փորձում էին իրենց իշխանությունը ընդարձակել ու հեղինակությունը բարձրացնել, ինչպես նաև ծավալել համազգային գործունեություն:

9. Որպես Կաթողիկոսական աթոռ՝ Աղթամարում օրհնվել է ս. Մյուռոն, ինչը ևս ակնարկված է այս գանձում, և պետք է արձանագրել, որ գանձում կա հավաստի տվյալ այն մասին, որ Աղթամարում ս. Մյուռոնը օրհնվել է Թովմաս առաքյալի Աջով<sup>42</sup>. «Սուրբ Միւռոնի նիւթն ի քէն բաշխի, / Որ է նման Հոգոյն ճշմարտի, / Աւրհնեն Աջով սրբոյն Թումայի, / Որ մխեցաւ ի կողն Յիսուսի» (430բ-1ա):

Ինչպես հայտնի է, 1113 թ. Աղթամարում Արծրունիների ստեղծած թագավորության հենքի վրա հաստատվում է կաթողիկոսական Աթոռ: Ուսումնասիրողները կարծում են, որ դրա համար կային հիմնավոր պատճառներ. Հայոց հայրապետական Աթոռն այդ ժամանակաշրջանում գտնվում էր բուն Հայաստանի տարածքից դուրս՝ Կիլիկյան Հայաստանում, ուստի՝ քաղաքական, տնտեսական, ազգապահպան, մշակութային և եկեղեցական բազմաթիվ խնդիրներ լուծելու համար անհրաժեշտ էր ունենալ երկրում գտնվող հոգևոր առաջնորդ<sup>43</sup>: Աղթամարում Կաթողիկոսական Աթոռի հաստատումը հիմնավորվում էր նաև նրանով, այն նախկինում եղել է թագավորական և կաթողիկոսական նստավայր<sup>44</sup>:

<sup>40</sup> Վ. Վարդանյան, *Աղթամարի կաթողիկոսության պատմություն*, Ս. Էջմիածին, 2017, էջ 29, 34:  
Կ. Մաթևոսյան, «Աղթամարի կաթողիկոսությունը», *Աղթամարի պատմամշակութային ժառանգությունը*, էջ 89:

<sup>41</sup> Վ. Թորոսյան, *Հայոց կաթողիկոսական իշխանությունը* (ԺԱ. դարի կեսեր - ԺԲ. դարի սկիզբ), Երևան, 2018, էջ 170:

<sup>42</sup> Լ. Թումանյան, *Վանա լճի կղզիների վանքերի գրչության կենտրոնները*, Երևան, 2020, էջ 21, 34:

<sup>43</sup> Վ. Վարդանյան, «Աղթամարի կաթողիկոսության հիմնադրման շուրջ», *ՊԲՀ*, 2010, թիվ 2, էջ 70-80, Կ. Մաթևոսյան, «Աղթամարի կաթողիկոսությունը», *Աղթամարի պատմամշակութային ժառանգությունը*, էջ 89-91:

<sup>44</sup> Կ. Մաթևոսյան, «Աղթամարի կաթողիկոսությունը», «Աղթամարի պատմամշակութային ժառանգությունը», էջ 86: Վ. Թորոսյան, նշվ. աշխ., էջ 161-162:

Մեր կարծիքով, վերոնշյալ հանգամանքներից բացի, կար մեկ կարևոր պատճառ ևս. եկեղեցական-ծիսական արարողությունների համար (մկրտություն, ձեռնադրություն, եկեղեցու օծում, ևն) անհրաժեշտ էր ս. Մյուռոն, որն օրհնելու իրավունք ունի միայն կաթողիկոսը: Ուստի հարց է առաջանում, ո՞ր սրբի մասունքն ունեն Աղթամարը՝ ս. Մյուռոն օրհնելու համար: Հովհաննես Բրգուլթենցի գանձը մեզ եզակի տեղեկություն է փոխանցում ս. Մյուռոնը օրհնվել է ս. Թովմաս առաքյալի Աջով<sup>45</sup>:

Հովհաննու Ավետարանը վկայում է, որ Թովմաս առաքյալը, լսելով Քրիստոսի Հարություն լուրը, ասում է. «Եթէ ոչ տեսից ի ձեռս նորա զնշան բեւեռացն, եւ արկից զմատունս իմ ի տեղիս բեւեռացն, եւ մխեցից զձեռս իմ ի կողս նորա, ոչ հաւատամ»: Ութ օր հետո Հիսուս դարձյալ երևում է աշակերտներին և Թովմասին ասում է. «Բեր զմատունս քո եւ արկ այսր, եւ տես զձեռս իմ, եւ բեր զձեռն քո, եւ մխեա ի կողս իմ, եւ մի՛ լինիր անհաւատ, այլ հաւատացեալ»: Թովմասը պատասխանում է՝ ասելով. «Տէր իմ եւ Աստուած իմ» (Յովհ. Ի. 24-29): Սրա համար էլ Հովհաննես Բրգուլթենցը Թովմաս առաքյալի Աջի համար նշում է՝ «Որ մխեցաւ ի կողն Յիսուսի»:

Այժմ անդրադառնանք Հովհաննես վրդ. Բրգուլթենցի՝ Թովմաս առաքյալին ձոնված գանձին: Սրա հիմքում սուրբ առաքյալի հայսմավուրքյան վարքն է, որը հեղինակը վերածել է չափածո և երգեցիկ գանձի: Համաձայն Հայսմավուրքի՝ Թովմաս առաքյալը քարոզել և նահատակվել է Հնդկաստանում: Նա Աստծու կամքով վաճառվում է Հնդկաստանից եկած Արբանես անունով վաճառականին, որն առաքյալին տանում է Հնդկաստանի Սեդրոք (Սեդրաք) անունով քաղաքը: Այնտեղ տեսնելով ս. Թովմասի աղոթքի զորությունը՝ նրան տանում են Գնդափառոս արքայի մոտ: Վերջինս իմանալով, որ առաքյալը հմուտ է ճարտարապետության և շինարարության գործում, խնդրում է տաճար կառուցել և նրան է վստահում իր ունեցվածքը՝ ինքը հեռանալով այլ երկիր: Վերադառնալով իմանում է, որ առաքյալը իր ողջ ունեցվածքը բաժանել է աղքատներին, և բանտարկում է նրան: Սակայն, երբ արքայի եղբայրը մահանում է, առաքյալի աղոթքով վերակենդանանում է և պատմում, որ երկնքում տեսավ առաքյալի կառուցած տաճարը: Ս. Թովմասին մեծարում են և ականատեսը դառնում նրա գործած բազմաթիվ այլ սքանչելիքների: Տարիներ անց առաքյալը նահատակվում է Մժդեհ արքայի հրամանով: Աշակերտները նրա մասունքները տանում են Ասորեստան: Հետագայում, ասորա-պարսկական պատերազմի ժամանակ Ուսուֆ անունով պարսիկ զինվորականը որպես ավար վերցնում է մասնատուփը: Տե-

<sup>45</sup> Լ. Թումանյան, նշվ. աշխ., էջ 20-21:

սիլքի համաձայն, տանում և ամփոփում է Վանա լճի ափին՝ Ռշտունյաց երկրում գտնվող Պարծիս գյուղում, և ինքն էլ դառնում քրիստոնյա<sup>46</sup>:

Մխիթարյան հայերից Հ. Ոսկյանը մեզ է փոխանցել Ս. Թովմաս առաքյալի վանքի նկարագրությունը: Վանքը գտնվում էր Վանա լճի ափին, վանքի մոտ էին Գանձակ և Մանազկերտ գյուղերը, հին Պարծիս գյուղի ավերակները: «Անիկա պարսպապատ է եւ ունի տաճար մը, գաւիթ մը եւ քանի մը սենեակներ ու ախոռներ: Տաճարը սրբատաշ քարերով շինուած է: Արտաքուստ չափազանց պարզ: Ունի ութանկիւն գմբէթ մը բրգաձև կաթուղիկէով, որուն գլուխը կը գտնուի նիզակ մը: Կողակը բոլորակաձեւ է՝ ռոմանական կամարով եւ զարդարուած ոսկեզօծ գեղեցիկ խաչկալով: Կողակի երկու կողմերը շինուած են մէկական աւանդատուններ: Ասոնցմէ մէկուն մէջ ամփոփուած է Ս. Թովմաս առաքեալի նշխարը: Արեւմտեան պատին կից կան նմանապէս երկու աւանդատուններ՝ նուիրուած Պետրոս եւ Պօղոս առաքեալներու: Եկեղեցւոյ երկարութիւնն է՝ 11, լայնութիւնը՝ 7 եւ բարձրութիւնը՝ 7.50 մետր: Գաւիթը սրբատաշ քարերով շինուած է: Չորս ամբողջական եւ ութ կիսասիւններու վրայ կը բոլորուին պայտաձեւ կամարները՝ բռնելով թաղակապ ձեղունը»<sup>47</sup>:

Համադրենք մեկ հատված գանձից և Գրիգոր Խլաթեցու խմբագրած հայսմավուրքյան վարքից<sup>48</sup>.

Թովմաս առաքյալի վարքը Հայսմավուրքում (այսուհետև՝ Վարք)

Եւ եհարց ցԹումա, թէ զի՞նչ գիտես առնել:

Եւ նա ասաց՝ ի գործ ֆարի և փայտի ճարտար եմ ես, ի շինուածս տան և դարպասի:

Թովմաս առաքյալին նվիրված գանձը (այսուհետև՝ Գանձ).

Նոյն Գրնդափառ եհարց Թումայի, թէ խելամո՞ւտ ես կազմող յարկի,

Թումայ ասէ, թէ՛ ի գործ ֆարի եմ ֆաջ տեղեակ, տան եւ դարպասի,

Վարք.

Ընդ որ յոյժ ուրախացեալ թագաւորն, և բացեալ զգանձատունն իւր, ետ ի նա բազում գանձս ոսկոյ և արծաթոյ, զի շինեսցէ իւր ապարանս թագաւորական գեղեցիկս և վայելուչս: Զայս բանատեղ արար Թումայի արքայն և ինքն գնաց ի հեռաւոր աշխարհ:

Գանձ.

Յոյժ խրնդացեալ Գրնդափառոսի, բացեալ ըզգանձս ոսկոյ եւ արծաթի,

<sup>46</sup> Տե՛ս Յայսմավուրք, Նաասարդի ժԲ և Օգոստոսի ԻԲ, Կ.Պոլիս, 1730, էջ ԻԸ-ԻԹ: Ս. Թովմաս առաքյալի վարքը Հայսմավուրքի մյուս խմբագրություններում տե՛ս Համաբարբառ Յայսմավուրք, Բ. Ը. Ա. Օգոստոս, աշխ.՝ Հ. Նիկողոսյանի, Ս. Էջմիածին, 2009, էջ 268-273:

<sup>47</sup> Հ. Ոսկեան, նշվ. աշխ., էջ 148-149:

<sup>48</sup> Յայսմավուրք, Նաասարդի ժԲ և Օգոստոսի ԻԲ, Կ.Պոլիս, 1730, էջ ԻԸ-ԻԹ:

Ետ ի թումաս ի պէտս տանարի, եւ ինքն գրնաց հեռաւոր տեղի,

Վարք.

Իսկ սուրբ առաքեալն թումաս զգանձն ամենայն զոր էառ ի թագաւորէն, բաշխեաց աղփատաց և կարօտելոց: Ընդ որ մախայր եղբայր թագաւորին և ոչինչ կարէր առնել թումայի:

Գանձ.

Սուրբ առաքեալն, որ թումաս կոչի, բաշխեաց զգանձ նորա աղփատի, Ընդ որ մախայր եղբայրն արփայի, ոչինչ կարէր առնել թումայի,

Վարք.

Մինչ զի յառաւել մախանացն, որ վատնեաց զհայրենի գանձս թագաւորին, հիւանդացաւ մեռն ի մահ:

Եւ իբրև դարձաւ արփայն, և ետես զեղբայրն իւր հիւանդացեալ և զտանարն ոչ շինեալ, բարկացաւ յոյժ, և ետ արկանել զառաքեալն ի բանտ:

Գանձ.

Ետես վատնեալ զգանձն իւր հայրենի եւ խաւթացեալ մեռն ի մահ մաւտի, Արփայն զեղբայրն ետես ի ցափ եւ ոչ շինեալ զպաղատն արփունի, Յոյժ բարկացեալ սրբոյն թումայի եւ գան հարեալ էարկ ի բանտի,

Վարք.

Եւ եղև զի մեռաւ եղբայր թագաւորին, և թումայ յարոյց զնա, և նա պատմեաց զգեղեցկութիւն դարպասին զոր թումայ յերկինս շինեալ էր թագաւորին:

Վասն որոյ հանեալ զթումա ի բանտէն, անկան յոտս նորա թագաւորն և եղբայրն իւր ամենայն մեծամեծօքն Հընդըստանայ:

Գանձ.

Իսկոյն մեռաւ եղբայրն արփայի, թումա յարոյց անուամբն Յիսուսի, Եւ նա պատմեաց զարմանք սրբաւրի, զի էր կազմեալ տանար տենչալի, Անդէն անկեան ի յոտս թումայի, հաւատացին յԱստուած կենդանի, Ուրախութիւն եղև հոգելի Հընդըստանա երկրին ամենի, Յետոյ բազում շատ ժամանակի Գընդափառոս առ Տէր փոխեսցի:

*Այսպիսով, հնարավոր եղաւ մեր ձեռագրական ժառանգութեան մեջ գտնել մեծանուն հայ տաղերգու Հովհաննէս վարդապետ Բրգութենց Ոստանցուն Աղթամարի Ս. Խաչին և Ս. Թովմաս առաքյալին ձոնված շափածոները: Ձեռագրերից մեկը (ՄՄ 5404) քայքայված է, ունի թափված էջեր, ինչի հետևանքով պակասում են Ս. Թովմաս առաքյալին նվիրված գանձի սկիզբը և տաղը՝ գրեթե ամբողջութեամբ: Աղթամարի Ս. Խաչին նվիրված գանձն ու տաղն ամբողջական են և մեզ հայտնի են մեկ ձեռագրով (ՄՄ 5521): Հովհաննէս վարդապետ Բրգութենցի հեղինակած գանձերն ու տաղերն ունեն ոչ միայն գեղարվեստական ար-*

ժեք, այլև բովանդակում են կարևոր պատմական և մշակութային փաստեր, աստվածաբանական գաղափարներ: Ակնկալում ենք, որ այլ ձեռագրերում ևս կգտնենք Հովհաննես վարդապետ Բրգուլթենցի վերոնշյալ գանձերը և տաղերը:

Ստորև ներկայացնում ենք Հովհաննես վրդ. Բրգուլթենցի Աղթամարի Ս. Խաչին և Թովմաս առաքյալին ձոնված գանձերն ու տաղերը<sup>49</sup>:

**ԳԱՆՁ ԱՂԹԱՄԱՐԱՅ ՍՈՒՐԲ ԽԱՉԻՆ  
Ի ԲՐԳՈՒԹԵՆՅ ՅՈՎԱՆԷՍ ՎԱՐԴԱՊԵՏԷ ՈՍՏԱՆՅՈՅԷ  
(ՄՄ 5521, 429ա-431ա)**

(429ա) Բարձրեալ անֆննին, Արփայ վերնային,  
Եռանձնական համագոյակին<sup>50</sup>,  
Ըղծակերտեալ գիրեշտակֆ հրրածին<sup>51</sup>  
Քեզ արբանեակ յերկրորդ գալըստին:  
Զագգըս մարդկան կազմեալ երկրային,  
Իշխան և Տէր Բում ձեռագործին,  
Ետուր գիտել ըզկամս Քո հրամանին,  
Խոտել ըզչարն և սիրել զբարին:  
Պատրեալ զԱղամ վիրագ<sup>52</sup>, պիղծ աւծին,

<sup>49</sup> Բնագրերի ուղղագրությունը պահպանել ենք այնպես, ինչպես դրանք նշյալ ձեռագրերում են, թողել ենք անգամ տառասխալներ՝ դրանք ծանոթագրելով տողատակին (հարկ է նշել, որ երբեմն հնչյունի բացակայությունն ու հավելագրումը պայմանավորված է բանաստեղծական հանգով): Զնշված տառերը վերականգնել ենք սուրանկյուն փակագծերում, գրչի համատոտումները (տարբեր տների վերջում) ևս բացել ենք սուրանկյուն փակագծերում: «0» հնչյունի գրությունը թողել նույնը (և՛ օ, և՛ ա), «և» շաղկապը երբեմն «և» է գրված, երբեմն՝ «ւ», մենք թողել ենք նույնությամբ՝ տաղաչափությունը չխախտելու համար, իսկ բառամիջում գրել ենք «և»:

<sup>50</sup> Համաձայն Քրիստոնեական եկեղեցու վարդապետության, Մի Աստված է՝ եռանձնյա՝ Հայր, Որդի և Սուրբ Հոգի, համագո, մի բնություն, մի էություն. «Հաւատամք գերրորդութիւն սուրբ՝ մի բնութիւն, մի Աստուածութիւն, ո՛չ երեք աստուածք, այլ մի Աստուած, մի կամք, մի քաղաւորութիւն, մի իշխանութիւն, արարիչ երևելեաց և աներևութից»։ *Ժամագիրք Հայաստանեայց Ս. Եկեղեցւոյ*, Վաղարշապատ, 1902, էջ 2:

<sup>51</sup> Քրիստոնեական եկեղեցու վարդապետության համաձայն՝ Հրեշտակներ լուսեղեն, հրեղեն էակներ են՝ «Իսկ ի մէջ աներևութիցն արարեալ աներևոյթ փառատուրիչս - զարս հրեշտակաց հոգեղենս, հրեղենս, բազմութիւնք զուարթնոց»։ *Վարդապետութիւն Սրբոյն Գրիգորի, ՄՀ, Բ. հատոր, Ե. դար, Անթիլիաս-Լիբանան, 2003, էջ 1426*:

<sup>52</sup> Վիրագ - Վայրագ, գազանամիտ, արիւնմանեղ, վայրենի և ամենի. *Նոր բառգիրք Հայկազեան լեզուի (նշԲ)*, Բ. Բ, կազմ.՝ Հ. Գ. Աւետիքեան, Հ. Խ. Սիրամէլեան, Հ. Մ. Ազգերեան, Վենետիկ-Ս. Ղազար, 1837, էջ 825:

Որ բնակարան էր այսոց<sup>53</sup> դիւին,  
 (429բ) Ելար ի հաշ // Քո Տէր կամովին,  
 Առ ոտս հարեր զվիշապն առաջին:  
 Մեզ պահապան է հաշն ելովին<sup>54</sup>  
 Պարիսպ ամուր ընդդէմ բանսարկուին,  
 Աղթամարայ Սուրբ Նշան հաշին՝  
 Սուսեր և զէն դէմ բելիարին<sup>55</sup>:  
 Մեղաց բարձաւոյ, մաքրարան հաւտին,  
 Դիմեցելոցս առ դրունս քոին,  
 Աստուածաբնակ Սուրբ հաշ քաւարան,  
 Տեառն Աստուծոյ Ահեղ Սուրբ Նշան, աղաչեմք:  
 Բախարար սիրով բաղձալի,  
 Աստուածապսակ Գագիկ արքայի,  
 Ընտրեալ գոյով յազգէն Արծրունի,  
 Հաւատացեալ Աստուծոյն Փրկչի:  
 Ի հայրածագ ծայրագոյն սեռի,  
 Քար դաւանաս<sup>56</sup> համայն կայսերի,  
 Մըշտածաւալ յէն բղիտողի,  
 Հոսանք Հոգոյն<sup>57</sup> առ նա ժողովի:  
 Հիմունս արկեալ յԱղթամար կըղզի,  
 Շինեաց զտանարն, որ Սուրբ հաշ կոչի,  
 Բարձրաւանդակ ի պատշան տեղի,  
 Մէջ կապուտակ ծովուն որակի:  
 Տարփատեն<sup>58</sup>, բարի ամենայն ազգի,  
 Վիմաւ փակեալ և անշարժելի,

53 Այս – Ոգի շար կամ պիղծ, այն է դև. *ՆՀԲ*, հ. Ա, էջ 93: Չար ոգի, սատանայ, դև. **Ռ. Ղազարյան**, *Գրաբարի բառարան*, Երևան, 2000, էջ 59:

54 Ելովէ – Աստծու անունը երբայերեն. **Ս. Մալխասյանց**, *Հայերէն բացատրական բառարան*, հ. Ա, Երևան, 1944, էջ 554:

55 Բելիար – Իբր սեփական անուն սաղայելի կամ բանսարկուին սատանայի. *ՆՀԲ*, հ. Ա, էջ 479: Սատանա. **Ռ. Ղազարյան**, *Գրաբարի բառարան*, էջ 282:

56 Դաւանաս – Խոստովանութիւն, հաւատալիք. **Ա. Կոստան**, *Բառգիրք հայերէն լեզուի*, Պէյրոս, 1998, էջ 95: *ՆՀԲ*-ում վկայված չէ:

57 Նկատի ունի Սուրբ Հոգու մշտնջենական բղիտումը Հայր Աստծուց. «Հաւատամք զսուրբ Հոգին Աստուած՝ անեղ, անժամանակ, ո՛չ ծնեալ, այլ բղիսեալ ի Հօրէ, էակից Հօր և փառակից Որդոյ»։ *Ժամագիրք Հայաստանեայց Ս. Եկեղեցւոյ*, էջ 2:

58 Տարփատեն – Շատ տարփալի՝ տենչալի. **Ռ. Ղազարյան**, *Գրաբարի բառարան*, էջ 550:

Մեծատաշ, դերբկի<sup>59</sup> կոփածով փարի,  
 Երկաթագամ և անխախտելի:  
 Ի պակուցումն եննեո<sup>60</sup>, շար գնդի,  
 Որ են ներհակ մարդկաին զարմի,  
 Աստուածաբնակ [Սուրբ Խաչ փաւարան,  
 Տեառն Աստուծոյ Ահեղ Սուրբ Նշան, աղաչեմք]:  
 Գըմբեթաւոր տանար սփանչելի,  
 Աղթամարայ Սուրբ Խաչ գովելի,  
 Երկնագունակ վերամբարձ երկնի,  
 (430ա)Համափատակ<sup>61</sup> // լուսոյն փաղափի:  
 Սիւն մարմարեա, կարծր, անդրդուելի,  
 Հիմն արկեցաւ կամաւն Յիսուսի,  
 Տէրն երեւեալ ի վերա յայտնի,  
 Կընֆեալ Աջովն Իւր անեղ<sup>62</sup> Բանի:  
 Առ դրունքս քո մըրգաբեր տընկի,  
 Աւագանին ծընունդ ցանկալի,  
 Աղթամարա Խաչ գերսփանչելի,  
 Արձան կանգնեալ ի մէջ ծովակի:  
 Երկնահանգէտ վայրի դալարի,  
 Թագաւորն ազն ի քեզ բնակի,  
 Դու նմանակ կենսատու Խաչի,  
 Որ ծաղկեցաւ ի Գողգոթայի:  
 Վահան ամուր հակառակ շարի,  
 Քրիստոնէից դու միշտ հովանի,  
 Աստուածաբնակ Սուրբ Խաչ [փաւարան,  
 Տեառն Աստուծոյ Ահեղ Սուրբ Նշան, աղաչեմք]:  
 Որ էնն Աստուած ի քեզ բնակի,  
 Կաթողիկէ Սուրբ Եկեղեցի,  
 Բազմապայծառ հրաշիւք ըղձալի,  
 Աւծումն և դրոշմ ի քէն ընձեռնի:  
 Դու անմատոյց խորան գերափի,

<sup>59</sup> Դերբուկ – Ապառաժ. ՆՀԲ, հ. Ա, էջ 611: Առապար, փարերի կոյտ. **Ռ. Ղազարյան**, *Գրաբարի բառարան*, էջ 360:

<sup>60</sup> Եննեոն – Նենգատու, խարդախ. ՆՀԲ, հ. Ա, էջ 660 («Եննեոնաշէն» բառի ներքո):

<sup>61</sup> Համափատակ – Համանման, յար և նման. ՆՀԲ, հ. Բ, էջ 24:

<sup>62</sup> Անեղ – Որ չէ եղական, ինքնագոյ. ՆՀԲ, հ. Ա, էջ 138: Անստեղծ, չստեղծուած, ինքնագոյ. **Ռ. Ղազարյան**, *Գրաբարի բառարան*, էջ 84:

Տէր Սաբաւովթ<sup>63</sup> ի քեզ գայ հանգչի,  
 Յանցաւորաց քաւարան ազգի  
 Եւ առագաստ բազմոց Քրիստոսի:  
 Վիմաւ մածեալ անդրդրդելի,  
 Մանուկ կառոյց ձեռամբքն իւրովի,  
 Այսաւ մանկունք երգով բերկրալի  
 Պատուեն զհանդէս հաշին խրախալի:  
 Աղթամարա Սուրբ հաշ պաշտելի,  
 Դու աւժանդակ քո պաշտանէի,  
 Հրագէն նշան, սուր անեղակի,  
 Է նախընթաց Տեառն ամենակալի:  
 Աստուած[աբնակ Սուրբ հաշ քաւարան,  
 Տեառն Աստուծոյ Ահեղ Սուրբ Նշան, աղաչեմք]:  
 (431բ) Իիսթեղ, չֆնաղ յարկ չնաշխարհի,  
 Զորեմանկեան և քառակուսի,  
 Հնձան փորեալ մէջ այգեստանի  
 Եւ աշտարակ միշտ անվանելի:  
 Որթըն սորեկ<sup>64</sup>, ազնիւ, պիտանի  
 Քո սուրբ գալիքս տնկեալ բուսանի,  
 Ժողով գնդի սուրբ մարգարէի,  
 Սուրբ առաքեալքն ի քեզ նըկարի:  
 Աւետարանիչ Կորնուս Կտակի  
 Կենդանագրեալ ի շորից կողմի,  
 Ազգի ազգի թոշումք թեալի  
 Են նկարեալ յորմն տաճարի:  
 Այլեւ յովով կենդանիք յայտնի  
 Սարսափելի մարդկան երեւի,  
 Հաւ անդրանիկն ի քեզ իջանի,  
 Իբր տաճարն Սողովմունի:  
 Մայր ամենից տապանակ ուխտի,  
 Հրեղէն պարիսպ յԱղթամար կղզի,  
 Աստուածա[բնակ Սուրբ հաշ քաւարան,  
 Տեառն Աստուծոյ Ահեղ Սուրբ Նշան, աղաչեմք]:

<sup>63</sup> Սաբաւովթ – եբրայերէն՝ Աստծու ստորոգելի, նշանակում է «Տէր զօրութեանց», տե՛ս նշՔ, հ. Բ, էջ 682:

<sup>64</sup> Սորեկ – Ազնիւ, պատուական, ընտիր. նշՔ, հ. Բ, էջ 730:

Թագաւորաց գան բարձր ի յերկրի,  
 Թագ բերկրանաց Հայոց մեծ ազգի,  
 Աթոռ փառաց, տեղ պատրիարգի,  
 Սրահ լուսոյ, նեմարան Բանի:  
 Մերձ առ շիրմին վեհին Գրիգորի՝  
 Աստուածաբան սուրբ վարդապետի,  
 Որ հանգուցեալ ի նարեկ գեղջի՝  
 Հուպ առ հիմըն սուրբ Սանդրխտի:  
 Հայրապետաց պարֆըն զետեղի,  
 Մեծ ւ երջանիկ փաշ մետրապալտի,  
 Ի քեզ նստեալ տոհմէն Արծրունի,  
 Կաթողիկոս հանուրց Հայկազնի:  
 (431ա)Սուրբ Միտռնի նիւթն ի քէն // բաշխի,  
 Որ է նման Հոգոյն ճշմարտի,  
 Արհնեն Աջով սրբոյն Թումայի,  
 Որ մխեցաւ ի կողն Յիսուսի:  
 Դուռն երկնային հանգոյն Սինայի,  
 Ի քեզ բազմի Միածին Որդի:  
 Յիշեա: Եւ եւ: Զանձ.:<sup>65</sup>  
 Էին թագունի դշխոյ Բարձրելոյն,  
 Աստուածամայր քոյ Աստուածորդոյն,  
 Ծնար զՔրիստոս Աստուած վեհագոյն,  
 Զգերեւանեալ ընդ Հաւր և Հոգոյն:  
 ԶՏէրըն բոլորից բացափայլագոյն,  
 Կազմեալ զհրանիւթն յեղական լուսոյն,  
 Լեր մեզ առիթ, ժտեա քո յորդոյն  
 Պաղատանաւ մեծի Ամլորդոյն<sup>66</sup>:  
 Ստեփաննոսի Վկային նախնոյն,  
 Լուսաւորչին ի Պալհատունոյն<sup>67</sup>,  
 Պահել զԱթոռս անվթարագոյն

<sup>65</sup> Համառոտումը բացում ենք՝ հիմք ընդունելով ժամագիրքը. «Յիշեա, Տէ՛ր, եւ ողորմեա: Եւ եւս առաւել գլորդորումն սիրոյ եւ զգործս բարեաց պարգեւել մեզ խնդրեմք: Տո՛ւր մեզ, Տէ՛ր Աստուած: Զանձինս մեր եւ զմիմեանս Տեառն Աստուծոյ ամենակալին յանձն արասցո՛ւք: Քեզ Տեառնդ յանձն եղիցո՛ւք» (Ժամագիրք, էջ 226):

<sup>66</sup> Նկատի ունի Հովհաննես Մկրտիչ Կարապետին:

<sup>67</sup> Տոնմանունը այսպես է գրված:

Ի դրանչելոյ<sup>68</sup> ապաստամբ այսոյն:  
 Ժողովրդեանս մեր միահաղոյն<sup>69</sup>  
 Տուր կեանս բարի հոգոյն և մարմնոյն,  
 Ննչեցելոցն ի տապան հողոյն,  
 Տեառնէ առցեն զփառս հանդերձելոյն:  
 Ի յոբելեան քան անցեալ թվոյն  
 Երսուն և հինգ ազգիս հակազոյն<sup>70</sup>,  
 Յարմարեցաւ զանձըս հրաշագոյն,  
 Աղթամարայ խաչին բարձրագոյն<sup>71</sup>:  
 Ողորմեա[ց մեզ]:<sup>72</sup>

### ՏԱՂ ԱՆՈՅՇ

**Ի ԲԲԳՈՒԹԵՆՅ ՅՈՎԱՆԷՍ ՎԱՐԴԱՊԵՏԷ ՈՍՏԱՆՅՈ**  
**(ՄՄ 5521, 431աբ)**

(ի ստորին լուսանցս՝ «Սուրբ Ոսկի քահանայդ նազելի յայն ձայնէ»)

(431ա) Յանգ ելեալ կազմեցար սուրբ խորան,  
 Յանշնչական յարձանաց վիմական,  
 Կառուցար Տեառնէն հանգըստեան,  
 Աղթամարայ սուրբ տանար քաւարան:

(431բ) Որ յերջանիկ սուրբ գնդիցն հիմնեցար,  
 Յառաքելոց սուրբ դասուց հաստեցար,  
 Երանակրան գլխաւոր սուրբ պետաց խնկեցար,  
 Պաշտանէիցն Յիսուսի պատուեցար:

**Վերնայարկ պատշգամ վարժարան,**

<sup>68</sup> Դրանչել – Գլուխ բարձրացնել, ապաստամբել. Ս. Մալխասյանց, հ. Ա, էջ 544: ՆՀԲ-ում վկայված չէ:

<sup>69</sup> Միահաղոյն – Միանգամայն, միահամուտ, բովանդակ ի միասին, խմբովին. ՆՀԲ, հ. Բ, էջ 266:

<sup>70</sup> Գրված է այսպես, նկատի ունի՝ հայկազուն:

<sup>71</sup>  $50 (\text{յոբելեան}) \times 20 + 35 = 1035$  Հայոց Մեծ թվ.  $+ 551 = 1586$  Փրկչական թվ.:

<sup>72</sup> Համառոտումը բացում ենք՝ հիմք ընդունելով ժամագիրքը. «Ողորմեաց մեզ, Տէր Աստուած մեր, ըստ մեծի ողորմութեան քում. ասացումք ամենեւեան միաբանութեամբ: Տէր ողորմեա՛, Տէր ողորմեա՛, Տէր ողորմեա՛» (Ժամագիրք, էջ 226):

Հրեղէն լեզւաւ առաքեալն զմայլեցան,  
Հրամանան Յիսուսի ի յերկիր շրջեցան,  
Քարոզելով զՀին և զՆոր Կտակարան:

Անարատ սուրբ գառին զենարան անապական,  
Սուրբ Մարմին և Արիւն ի Տեառնէ բաշխեցան,  
Սուրբ դահլին, առագաստ բնակութեան,  
Աղթամարայ կենագործ ձօնարան:

Ներծագումն նախընթաց Քրիստոսի,  
Կործանիչ եղեռնագործ չար դիւի,  
Հոյակապ յԱղթամար փաղափի,  
Կարկաշասան կոհակացըն միջի:

Նախագահ Աստուածընկալ բուժարան,  
Ներկեցար յԱրեւն Տեառնական,  
Գերահրաշ գերագով սրբութեան  
Իմանալի փաղափին նմանական:

Երանելի արփիափայլ սուրբ Նշան,  
Վաւերական Տեառն Աթոռ բարձրական,  
Աղթամարայ ահեղահրաշ Սուրբ Նշան,  
Տօնողացս համարէն աւգնական:

Սուր մխեալ յարեւնէն Քրիստոսի,  
Ի նորոգումն մարդկային միշտ զարմի,  
Զորեկողմեան տիեզերաց աշխարհի,  
Որք տօնեն զհանդէս տանարիդ գահոյի:

**[ԳԱՆՁ ԹՈՒՄԱՅԻ ԱՌԱՔԵԼՈՅՆ  
Ի ԲՐԳՈՒԹԵՆՅ ՅՈՎԱՆԷՍ ՎԱՐԴԱՊԵՏԷ ՈՍՏԱՆՅՈՅԷ]  
(ՄՄ 5404, 211ա-213բ)**

(211ա) (Սկիզբը թափուած)/// մըխեաց,  
Զքեզ վաճառեմ առս այսմիկ Հընդկաց, որ է եկեալ ի յարեւելեաց,  
Ասաց Թումաս՝ Կամք քո եղիցի, Տէր, Արարիչ Յիսուս իմ Աստուած,

Վրկայ առեալ գորդի  
 և Զեբեթեա<sup>73</sup> և ըզՊետրոս, գոր Վէմ անուանեաց,  
 Ես՝ Տէր Յիսուս ի Կուսէն ծընած, որ Յովսէփա զիս որդի ձայնեաց,  
 Դահեկանի երրակի տասանց վաճառեցի գրբով ձեռնարկած,  
 Յուդի անկեալ Արբանէս գնաց, տարեալ զԹումաս ի սահմանս  
 Հընդկաց:

Աղերսանամ սրբոյ[ն]:

Անդ ի յերկիրն Հընդըստանա, Սեդրակ անուն ֆաղաֆն, որ անդ կայ,  
 էր հարսանիս յայնմ աւուր նոցա արհաւորդոյն կայսրին Սեդրակայ,  
 Տարան զԹումաս հարկի առ նոսա, նըստէր տըրտում ի միջի նոցա:  
 Եւ բարկացեալ մատըռուակ նըմա, էած ապտակ ի յերեսս նորա:  
 Թումաս անէծ զայրագին նմա, շունֆ ֆարշեսցեն ըզբագուկ նորա,  
 Իսկոյն գնացեալ բերել չուր նոցա, պատահեցաւ առիծ մի նըմա,  
 (211բ) Եւ պատառեալ գիշատեաց ըզնա, աստէն առեալ // զցաւն  
 առհաւատչա,

Զոր կիմիկոս<sup>74</sup> առեալ զձեռն նորա, բերեալ ի մէջ բազմոցին ըզնա,  
 Եւ յարուցեալ անկան յոտս նորա, արհնեաց ըզհարսն և զփեսայն նորա,  
 Իսկ Արբանէս տարաւ ըզԹումա առ թագաւորն Գընդափոռա:  
 Աղեր[սանամ սրբոյն]:

Նոյն Գընդափառ եհարց Թումայի, թէ՛ իսելամո՞ւտ ես կազմող յարկի,  
 Թումայ ասէ, թէ՛ ի գործ ֆարի եմ ֆաջ տեղեակ տան և դարպասի,  
 Յոյժ իւրնդացեալ Գընդափառոսի, բացեալ ըզգանձս ոսկոյ և արծաթի,  
 Ետ ի Թումաս ի պէտս տանարի, և ինքն գընաց հեռաւոր տեղի,  
 Սուրբ առաքեալն, որ Թումաս կոչի, բաշխեաց զգանձ նորա աղքատի,  
 Ընդ որ մախայր<sup>75</sup> եղբայրն արֆայի, ոչինչ կարէր առնել Թումայի,  
 Ետես վատնեալ զգանձն իւր հայրենի և խաւթացեալ մերձ ի մահ մաւտի,  
 Արֆայն զեղբայրն ետես ի ցալի և ոչ շինեալ զպաղատն արֆունի,  
 Յոյժ բարկացեալ սրբոյն Թումայի և գան հարեալ էարկ ի բանտի,  
 (212ա) Իսկոյն մեռաւ եղբայրն արֆայի, Թումա յարոյց // անուամբն  
 Յիսուսի,

Եւ նա պատմեաց զարմանֆ սրխրալի, զի էր կազմեալ տանար տենչալի,  
 Անդէն անկեան ի յոտս Թումայի, հաւատացին յԱստուած կենդանի,

<sup>73</sup> Զեբեդեոսի որդիներն են Հովհաննես և Հակոբոս առաքյալները:

<sup>74</sup> Կիմիկոս (հուն. ΚΥΝΙΚΟΣ) – Շուն, շնական. Ս. Մալխասյանց, *Հայերէն բացատրական բառարան*, հ. Դ, Երևան, 1945, էջ 436: Հայսմավորչյան վարժում գործածված է «շուն» բառը. Յայսմաւոր, էջ ԻԹ:

<sup>75</sup> Մախալ – Նախանձել, խանդել, չարակնել. *ՆՀԲ*, հ. Բ, էջ 189:

Ուրախութիւն եղեւ հոգեղի Հընդըստանա երկրին ամենի,  
Յետոյ բագում շատ ժամանակի Գընդափառոս առ Տէր փոխեսցի:  
Աղերսանաւ [սրբոյն]:

Նոր թագաւոր մի Մըշդեն ձայնեալ, քան զքանսարկուն, այլ շար ւ  
անիծեալ,

Նա շարշարեալ զԹումա առաքեալ և աշտէի ի կողըն խոցեալ,  
Ուստի եկեալ նոր հաւատացեալ, բարձին զմարմին արհմութեամբ  
թաղեալ,

Իսկ արային որդիքն, որ ընտրեալ, զոր Սուգանէս, Սիփորայ կոչեալ,  
Տեսին զԹումաս, որ նահատակեալ, և ի հաւատս հաստատուն կացեալ,  
Ի ծառայցն ոմն այսահարեալ, շար Մըշդենա ի դիւն լըկեալ,  
Յառաքելոյ տապանըն դիմեալ և առժամայն անդէն ոչ զըտեալ,  
Զի աշակերտ սրբոյն թագուցեալ, յետ այնորիկ յԱսորիս տարեալ,  
(212բ) Ի տապանէն սրբոյն հող առեալ և // ի վերա ծառային արկեալ,  
Ընդ որ փութով յոյժ առողջացեալ ի տապանէ սրբոյն բըժըշկեալ:  
Աղերսանաւ սրբ[ոյն]:

Էանց տարի, յետ ժամանակի ասպատակեալ Պարսիցն յԱսորի,  
Գնացեալ հասին Թաղթան քաղաքի, ուր էր մարմին սրբոյն Թումայի,  
Նախարար ոմն, որ Ուսուֆ կոչի, տեսեալ զտապան սրբոյն Թումայի,  
Էր զարդարեալ յոյժ զարմանալի, ընդելուզեալ<sup>76</sup> յոսկոյն կեփագի,  
Զոր իմացեալ, թէ գանձ լինիցի, պահեաց առ ինքն մինչ երեկոյի,  
Եբաց ետես ինքն մեկուսի, զի էր ոսկեր մարդոյ մեռելի,  
Զի ոչ ոմնէր զհաւատս Քրիստոսի, կարծէր նըշխար գնա նահատակի,  
Յրուեաց ի յոսս ձիոցն ամենի և առաքուր արար<sup>77</sup> բընաւի,  
Զոր զոփացեալ<sup>78</sup> ի նոյն գիշերի, զարթեալ ետես վառ նման ջահի,  
Եւ ամփոփեալ եղ ի յարկելի, բերեալ ի յայս ի գաւառն Աղձնի,  
Մերձ ի յայն շէն, որ Վան յորջորջի և հաւատաց Ուսուֆ Քրիստոսի,  
Դարձեալ կամաւ սրբոյն Թումայի, տարեալ զմարմին ի յայլում վայրի,  
(213ա) Աստղն // երեւեալ լուսափայլ յայտնի դէպ յարեւելս  
յերկիրն ըմբշտունի,

Եւ դադարեալ աստղն ի յայն բլրի, վերա գեղջին, որ Պարծիս կոչի,  
Եւ անդ եղին զնըշխար Թումայի, ի վիմափոր քարեայ տապանի,

<sup>76</sup> Ընդելուզել – Ագուցանել ընդ միմեանս կամ ի մի շար, հիւսել, յարել. ՆՀԲ, հ. Ա, էջ 770:

<sup>77</sup> Առաքուր անել – Կոխկրտել, ոտքի տակ առնել. ՆՀԲ, հ. Ա, էջ 282:

<sup>78</sup> Զոփալ – Դողալ, սարսուռալ. ՆՀԲ, հ. Ա, էջ 751: Դողալ, դողդողալ, սարսուռալ, սարսափել, զարհուրել. Ռ. Ղազարյան, Գրաբարի բառարան, էջ 450:

Զոր և յետոյ Արծրունեաց տոհմի, զնա կառուցին տանար տենչալի,  
Եւ փարատիչ մարդկաին ախտի, ընդշտունեաց երկրին [ամե]նի:

Յիշեայ: Եւ ես առ[աւել]: Զանձինս:<sup>79</sup>

Սուրբ մայր Միածնին՝ Կոյս Աստուածածին, լուծիչ մեղաց մաւրն  
յանցաւորին,

Սգեստ լուսանիւթ երկնից արփային, յարկ նեմարան անեղ կազմողին,  
Մայր և ծննաղ Աստուծոյ Բանին, և տաղաւար Հոգւոյն ճշմարտին,  
Կերակերեցեր կաթեամբ զֆո զորդին, այն որ պատկեր է Հաւրն  
երկնային,

Միշտ աղաչեա զֆո Աստուածորդին՝ մեզ պարգեւէ զհանգիստն  
երկնային,

Կոյս և անախտ սրբոյն թումային, որ յիշատակ սորին կատարին,  
Սուրբն Յովաննէս լըրումն զստուերին և Ստեփաննոս ցելեալ ըզերկին,  
Սուրբըն Գրիգոր արհի պանծալին՝ լուսաւորիչն ազգիս Արամին,  
(213բ) Լուսա//նըշոյլ Խաչն աստուածային, միշտ յարակա սուրբ  
Կոյս Բեզ լիցին,

Եւ ամենայն դասք սրբոց զընդին՝ երկնաւորեաց և որք երկրաին,  
Առ Բեզ կըցորդ ցանկ զամենեսին, բարեխաւսեա առ ֆո Միածնին,  
Պանել անշարժ զսուրբ զեկեղեցի, ես առաւել զազգս ապատեսին(°),  
Գրքայ երգող զանձիս թումային ի Յովաննէս յիմար ւ անարին,  
Որ մականունն Բրբգոյս ձայնէին, մեղաւ անկեալ ի ծուղակ շարին,  
Փրկեա զմեզ, Տէր, ի հաղբից նորին, խառնէ ի դասս սրբոցն երամին,  
Հոլովական թըվիս տումարին հազար ու քսան և ութ ընդ նմին<sup>80</sup>,  
Նոր երգեցաւ զանձըս թումային, զեղանակողֆդ արհնէ Բանըն  
Հայրածին:

Ողորմեաց մեզ<sup>81</sup>:

<sup>79</sup> Համառոտումը բացում ենք՝ հիմք ընդունելով ժամագիրքը. «Յիշեա, Տէր, եւ ողորմեա: Եւ ես առաւել զյորդորումն սիրոյ եւ զգործս բարեաց պարգեւել մեզ խնդրեմք: Տո՛ւր մեզ, Տէր Աստուած: Զանձինս մեր եւ զմիմեանս Տեառն Աստուծոյ ամենակալին յանձն արասցո՛ւք: Քեզ Տեառնդ յանձն եղիցո՛ւք» (Ժամագիրք, էջ 226):

<sup>80</sup> 1028 + 551 = 1579 Փրկչական թվ.:

<sup>81</sup> Համառոտումը բացում ենք՝ հիմք ընդունելով ժամագիրքը. «Ողորմեաց մեզ, Տէր Աստուած մեր, ըստ մեծի ողորմութեան քոմ. ասասցո՛ւք ամենեւեան միաբանութեամբ: Տէր ողորմեա՛, Տէր ողորմեա՛, Տէր ողորմեա՛» (Ժամագիրք, էջ 226):

**ՏԱՂ ՍՈՒՐԲ ԱՌԱՔԵԼՈՅՆ ԹՈՒՄԱՅԻ,  
Ի ԲՐԳՈՒԹԵՆՅ ՅՈՎԱՆՆԷՍ ՎԱՐԴԱՊԵՏԷ ՈՍՏԱՆՅՈՅ ԱՍԱՅԵԱԼ  
(ՄՄ 5404, 213բ)**

**Վայ է ինձ մեղաւորիս:**

Յանեղէն կազմեցան արարածք,

Հայր և Որդի և Սուրբ Հոգին բնաւ[ս էա]ծ,

Զառաբեալսն ի ծովէն Տէր կոչեաց

Եւ նոքաւ ըզմարմին դիկք վերածեաց:

Որում և սուրբ առաքեալըն Թումաս/// (շարունակութիւնը թափուած):

LUSINE TUMANYAN

#### THE LITANIES AND ODES OF YOVHANNĒS BRGUT‘ENTS‘

**Key Words:** Yovhannēs Brgut‘ents‘, Vostan city, *gandz* (litany), *tagh* (ode), manuscript, Aght‘amar island, Surb Khach (Holy Cross) church, Apostle Thomas.

The article contains the first publication of the *gandzs* (litanies) and *taghs* (odes) of the famous Archimandrite Yovhannēs Brgut‘ents‘, which we have found in manuscripts. They are dedicated to the Church of Aght‘amar island and Apostle Thomas. We found information that one of the manuscripts taken from the Narek Monastery to Aght‘amar contained Yovhannēs’s litanies. According to another source, another manuscript kept in Aght‘amar contained a *gandz* and a *tagh* of the same author.

We tried to find these manuscripts. There is a manuscript, written in 1440 in Vostan, which Ghevond P‘irghalemyan saw in the Narek Monastery in 1866. It was taken to the Aght‘amar Monastery, and in 1915–1916, during the Genocide, it was rescued and brought to Holy Ēchmiadzin. Now it is Ms M5404. In the 17<sup>th</sup> century, the *gandz* of Yovhannēs Brgut‘ents‘ dedicated to Apostle Thomas was written on the last pages of this manuscript.

As for the manuscript that Archimandrite Ghevond saw in Aght‘amar in 1602, it is certainly the same manuscript written by T‘uma Minasnets‘ in 1445 in Aght‘amar (M5521). In 1602, the *gandz* and the *tagh* of Yovhannēs Brgut‘ents‘ dedicated to the Church of Surb Khach (Holy Cross) in Aght‘amar were added on the last pages of this manuscript.

ЛУСИНЕ ТУМАНЯН

## ГАНДЗЫ И ТАГИ ОВАНЕСА БРГУТЕНЦА

**Ключевые слова:** Ованес Бргутенц, город Востан, *гандз*, *таг*, рукопись, остров Ахтамар, церковь Сурб Хач (Св. Крест), апостол Фома.

В статье впервые публикуются обнаруженные нами гандзы (церковные песнопения) и таги (оды) известного архимандрита Ованеса Бргутенца, посвященные церкви на острове Ахтамар и апостолу Фоме. До нас дошли сведения, что одна рукопись, вывезенная из Нарекского монастыря в Ахтамар, содержит песни Ованеса Бргутенца. Согласно другому источнику, в другой рукописи, хранящейся в Ахтамаре, содержится гандз и таг Ованеса Бргутенца.

Мы попытались найти эти рукописи. Есть рукопись, написанная в 1440 году в Востане, которую Гевонд Пиргалемян видел в Нарекском монастыре в 1866 году. Спустя годы она была перевезена в Ахтамарский монастырь. В 1915-1916 гг., во время Геноцида, рукопись была спасена и перевезена в Святой Эчмиадзин, а сейчас находится в Матенадаране имени Месропа Маштоца (М 5404). На последних страницах этой рукописи в XVII веке был написан гандз Ованеса Бргутенца, посвященная апостолу Фоме.

Что касается рукописи, которую архимандрит Гевонд видел в Ахтамаре в 1602 году, мы уверены, что это та самая рукопись, которую Тума Минасенц скопировал в 1445 году в Ахтамаре (ММ 5521). В 1602 г. на последних страницах этой рукописи были добавлены гандз и таг Ованеса Бргутенца, посвященные церкви Сурб Хач (Святой Крест) на острове Ахтамар.